

Kalaallit Nunaanni Kommuneni Suleqatigiinnissaq Sunniuteqaqataanissarluk pillugit tunngavissatut isumaqatigiissut

Kapitali 1 Suleqatigiinneq sunniuteqaqataanerlu

Kommunet susasaqarfii ingerlaavartumik eqeersimaartuarnissaminnut, eqaatsumik ingerlatsinissaminnut kiisalu atuisunut sammiveqarnissaminnut qularnaarisussamik allanngoriartortuupput. Allanngoriartornermut pisariaqartinneqarput sulisut tunniusimasut, eqeersimaartut pitsaassusissanillu ilitorisimannissuseqartut. Taamaattumik pingaaruteqarluinnarpoq suleqataasut ataasiakkaat piartuarnernut taamattunut akuusutut nammineerlutik misigisimasinnaanissaat. Pisortaatut suleqataasullu suleqatigiillutik kommunalbestyrelsip anguniagassatut aalajangersartagai piviusunngortinniartartussaavaat.

Kommunep ingerlatsiviini suliffeqarfiutaannilu sulilluarnissamik suleqataasut soqutiginninnerisa nakussassaavigineqarnissaa siunertaralugu aammalu sulinermik iluarisimaarinninneq qulakkeeriffiginialugu kommunep suliffeqarfiutaanni assigiinngitsunik qaffasissusilinni tamani siulersueriaatsit sapinngisamik annertunerpaamik suleqataasunut ataasiakkaanut suleqatigiiaanulluunniit akisussaassusermik pisinnaatitsinermillu tunisisunik imaqartut atorneqassapput. Taamaaliornikkut sulisut nammineq sulinerminni suliat aaqqissuunneqarnerannut ilusilersugaanerannullu aalajangeeqataasarnissanut aammalu aalajangiinnissat qanilliarneqarnerinut sunniuteqartarnissanut periarfissinneqassapput. Suleqatigiinnissap sunniuteqaqataanissallu siunertassaannik imassaannillu oqallisiginnissimaneq tunngavigalugu pisortat sulisullu sinniisaasa akornanni isumaqatigiissutigineqassapput suleqatigiinnerup sunniuteqaqataanissallu timitalersorneqarnissanut periaasissat ilusiliussassallu.

Ulluinnarni suleqatigiinneq aaqqissuussaasumik ingerlanneqaqqullugu inerisaavigineqaqqullugulu Suleqatigiiffiusussanik assigisaannilluunniit (matuma kingornagut Suleqatigiinnissamut Ataatsimiititalianik taagorneqartussanik) kap. 2 naapertorlugu pilersitsineqassaaq, taannalu inuttaqassalluni (allaffimmi) pisortat suleqataasullu sinniisaannik. Suleqatigiinnissamut Ataatsimiititaliap isumaginiagassaraa sulinermi sulianillu ingerlatsinermi pissutsit pitsaasut toqqissisimanartullu piuinnarnissaat aammalu suleqataaffiginiassallugu suleqataasut tamakkerlutik ulluinnarni suleqatigiinnermi tunniusimatinneqarnissaat.

Illuatungeriit pilersaarusiorfigissavaat Suleqatigiinnissamut Ataatsimiititaliamut ilaasortat ataatsimoorlutik ilinniartinneqarnissaat aammalu sunniuteqarfigissallugu ilinniartitaanissap taassuma Suleqatigiinnissamut Ataatsimiititaliap ilaasortaannut tamarmiusunut periarfissiissutigineqarsinnaanissaa.

Inatsisit, maleruagassat malittarisassallu atuuttut, kommunalbestyrelsep aalajangersagai, allaffeqarfikkut aalajangersakkat kiisalu ataatsimoortumik isumaqatigiissutit ataasiakkaanullu isumaqatigiissutaasut pisortat suleqataasullu suleqatigiinnerminni ataqqissavaat.

Kapitali 2. Periusissat ilusissallu

- 2.1 Ataatsimiititaliap ilusissaa sumiiffinni ataasiakkaani isumaqatigiissutigineqartassaaq, taamaalilluni kommunemi pisariaqartitat isiginiarneqartarniassammata, aammalu suleqataasut suleqatigiinnissamut sunniuteqaqataanissamullu periarfissaat nakussassaavigineqarniassammata, imatullu sanarfisaassalluni suleqatigiinnissamut sunniuteqaqataanissamullu piginnaangorsaaqataassalluni sunniuteqarnerulersitseqataassallunilu. Kommunep suleqatigiinnissamut sunniuteqaqataanissamullu aaqqissugaaneranut tamakkiisumik ataqatigiissaaraluni aaqqissuussineqassaaq. Aaqqissuussineq kommunep pisortaqarnikkut aaqqissugaaneranut naapertuutissaaq.
- 2.2 Ilusiliussassaaq periusissaliorfigineqassaaq kommunep imaluunniit suliffeqarfiit ataasiakkaat imminni aaqqissugaanerat pissuseqarnerallu isiginiarlugit. Ilusiliussassami ilanngunneqassapput Suleqatigiinnissamut Ataatsimiititaliaqarnissaaq, sulisut ataatsimeeqatigiittarnissaat il.il.
- 2.3 Isumannaallisaanikkut suliassat ataatsimiititaliaqarnermut akuliunneqarnissaat isumaqatigiissutigineqarsinnaavoq. Taamaaliortoqassappat qularnaarneqassapput sullivinni avatangiisit pillugit inatsisip aalajangersagartaasa maleruarneqarnissaat.
- 2.4 Illua tungeriit kissaatigippassuk imaluunniit ataatsimiititaliap ilusissaa isumaqatigiissutigineqarsinnaanngippat makku atuutissapput:
- Pisortaaunit suleqataasunillu pissusissamisoorsorineqarpat kommunep suliffeqarfiillu allat iluini suleqatigiinnissamut ataatsimiititaliortoqarsinnaavoq.
 - Kommunemi Meeqqanut Atuarfinni ikinnerpaamik suleqataasut 20-uppata suleqatigiinnissamut ataatsimiititaliortoqassaaq.
 - Suliffeqarfinni suleqatigiinnissamut ataatsimiititalianik pilersitsiffiusimanngitsuni pisortaaunit suleqataasullu suleqatigeeriaasissanik suleqatigiinnissamut ataatsimiititaliap siunertaanik isumagisassaannilu isiginiaasumik pilersitsissapput.
- 2.5 Taamaaliortoqareerpat kommuneq ataasiakkaat sulisut sinniisaat peqatigalugit kommunep suleqatigiinnissamut ataatsimiititaliaa malittarisassaliuutissavaat / suleqatigiinnissap sunniuteqaqataanissallu siunertassaa imarisassaalu ilusilersuiffigissavaat. Malittarisassat imarisassaasa minnerpaaffissaat tassaavoq massuma kapitaliini 3-5-mi aalajangersakkat assingi.

Kapitali 3 Suleqatigiinnissamut Ataatsimiititaliap isumagisassai

3.1 Suleqatigiinnissamut Ataatsimiititaliap isumagisassarai:

- 1) Paasissutissanik tigooraanissaaq kiisalu suliffeqarfiup sulineranut sulisoqarneranullu tunngassuteqartunik pingaaruteqartunik tamanik oqallisiginnittarnissaaq, matuma ataani

sammisassallugit suliffeqarfiup aningaasaqarnikkut inissisimanera, pisariillisaassuteqarnissat sulianillu allangortiterinissat annertunerusut kiisalu teknikkikkut atortunik nutaanik pissarsinissaq atuinissarlu.

- 2) Suliffeqarfiup suliaanut sulisoqarneranullu tunngassuteqartut aqqissugaanissaannut najoqqutassanik aalajangersaaniarnermi aalajangeeqataasuunissaq.
- 3.2 Suliffeqarfiup suliaanut sulisoqarneranullu tunngassuteqartut aqqissuussiffigineqarnissaannut najoqqutassiornissamut killissarititaapput suliffeqarfimmi pineqartumi pisortaasut akisussaaffittut oqartussaaffittullu pisinnaatitaaffii.
- 3.3 Suleqatigiinnissamut Ataatsimiititaliami ilaasortat kiffaanngissuseqarlutik ataatsimiititaliami aqqusaarneqarsimasunik tusarliisinnaatitaapput. Ilaasortalli kialluunniit eqqarsaatigisassavai pissutsit Suleqatigiinnissamut Ataatsimiititaliami ilaasortaanini pissutigalugu ilisimalersimasami saqqummiutinnginnissai, tassa pissusissamisuginnartumik isertuunneqarnissaat piumasarineqarpat imaluunniit peqqussutigineqarpat. Ilaasortaq Suleqatigiinnissamut Ataatsimiititaliamut ilaasortajunnaaraluarpalluunniit nipangersimasussaataaneq unissanngilaq.
- 3.4 Pisortat pisussaaffigaat suliffeqarfimmi sulinermit sulisoqarnermullu tunngassuteqartut pingaaruteqartut tamaasa ilisimatitsissutigisassallugit. Taamatut aamma sulisut toqqagaasa pisussaaffigaat sulisut isumaasa kiisalu pissutsit sulisunut tunngassuteqartut suleqatigiinnermut pingaaruteqartut Suleqatigiinnissamut Ataatsimiititaliamut paasissutissiissutigisarnissaat. Pissutsit tamakkerlutik paasissutissiissutissatut pisussaaffigineqartut illuatungeriit arlaannit kissaatigineqarpat Suleqatigiinnissamut Ataatsimiititaliami oqaluuserineqartassapput.
- 3.5 Paasissutissiineq ima siusitsigisumik pisassaaq oqaluuserinnilluarnissaq periarfissinneqarluarluni, taamaalilluni sulisut toqqagaasa isumaat siunnersuutaallu aalajangiinissani tunngavittut ilanngunneqarsinnaasaqqullugit.
- 3.6 Pingaartumik pisortaasut pisussaaffigaat Suleqatigiinnissamut Ataatsimiititaliamut makku oqaluuserineqarnissaat siunnerfigalugu paasissutissiisarnissaq:
 - 1) Pisariillisaanissamut annertunerusumik iliusaasussat sulianilluunniit allangortiterinissat sulinermit sulisoqarnermullu kingunissaasa oqaluuserineqarnissaat periarfissaqarfigineqarniassammat. Iliuusissatut eqqarsaatigineqartut annertussusissaat sordiaanissaallu pillugit paasissutissat pisariaqartut pisortaasut saqqummiuttassavaat. Ajornartorsiutit allangortiterinissat pilersitassaat tamakkerlutik oqallinnermi ilanngullugit sammineqartassapput, suleqataasullu toqqissisimanissamut pisariaqartitaasa eqqanaarneqarnissaat pingaartinneqartassaaq.
 - 2) Akisussaaffeqarfiup pineqartup aningaasatigut siumut missingersuutissaannut siunnersuutit naatsorsuutillu. Naatsorsuuteqarnermi aningaasaqarnermilu pissutsit annertuumik allangortiteriffigineqarnissaat pillugit pisortaasut ingerlaavartumik ilisimatitsissuteqartassapput. Paasissutissiineq pisassaaq apeqqutit sulinermit sulisoqarnermullu tunngassuteqartut oqaluuserineqarsinnaasarniassammata.

3) Nutaamik teknikkikkut atortoqalernissamik pilersaarutit, matuma ataani taamaattumik atortoqalernissap siunertaa kiisalu taamaaliornissap kingunerisassaattut naatsorsuutigineqartut. Tassunga atatillugu pisariaqartitsineq naapertorlugu suliaasanut allanut sungiusarneqarnerit ilinniaqqinnerillu najoqqutassiorfigineqassapput.

3.7 Suleqatigiinnissamut Ataatsimiititaliaq makku najoqqutassiorneqarnerinut aalajangersaaqataasassaaq:

A. Sulinermut tunngassuteqartut, matuma ataani:

1. ulluinnarni suliffiup qanoq inissisimanissaa uninngatsiartarfissallu
2. atugarissaartitsinissamut iliuusaasussat kiisalu taakkua piviusunnngortinniarneqartarnissaat
3. pissutsit suleqataasut isumannaallisaavigineqarnerannut tunngassuteqartut
4. illup iluani malittarisassat
5. suliat aaqqissuussiffigineqarnerat
6. suleriaasissat aalajangersaavigineqarnerat
7. init suliffissat piukkunnartut aaqqissuunneqarnerat
8. suliffiit timimut naleqqussarneqarnissaat
9. atortunik, maskiinanik atortussanillu isumatusaartumik atuineq.

B. Sulisunut tunngasut, matuma ataani

1. atorfinitsitsinerit
2. soraarsitsinerit
3. qaffatsitsinerit
4. suleqataasunik illup iluani ilinniartitsinerit
5. sulisunik allanut inissiinerit, suliaasanut allanut sungiusarneqarnerit ilinniaqqinnerillu
6. ilisarititsisarnermut pilersaarummik ilusilersuineq piviusunnngortitsinerlu
7. atorfiit allaaserineqarnerat
8. sulisut naliliivigineqarnerat
9. arnat angutillu naligiissitaanerat

3.8 Illuatungeriit arlaat kissaatigisamik saqqummiussaqqarpat najoqqutassiornissaaq siunnerfigalugu Suleqatigiinnissamut Ataatsimiititaliami tamatuma oqallisigineqarnissaa sapinngisamik piaarnerpaamik aallarnerneqassaaq. Najoqqutassat Suleqatigiinnissamut Ataatsimiititaliami aalajangersarneqarnissaannut illuatungeriit isumaqatigiillutik aalajangersaaniarnissaat piumasaaqataavoq. Oqallinnerni ajunngitsumik isumaqatigiinniarusussuseqarneq ersersinneqartassaaq.

3.9 Najoqqutassat aalajangersaavigineqartut Suleqatigiinnissamut Ataatsimiititaliap ataatsimiissutaasa imaqarniliorneqarneranut allallugit ilusiliivigineqarsimassapput imaluunniit allatut iliorluni allanneqarsimassallutik, soorlu illuatungeriit atsiugaannik immikkut allakkiuullugit. Najoqqutassiat pisortaasunut sulisullu sinniisigisaannut qilersuisuupput, tassalu timitalinnik pisoqartillugu pisortaasut sulisullu sinniisigisaat pisussaapput najoqqutassat aalajangersaavigineqartut taakku illersortassallugit atuutsittassallugillu.

3.10 Illuatungeriit tamarmik immikkut najoqqutassatut aalajangersaavigineqarsimasut atuukkunnaartinniarsinnaavaat qaammatinik marlunnik piffissaliillutik. Unitsitsiniaasoqartinnagu Suleqatigiinnissamut Ataatsimiititaliami nalinginnaasumik

oqallisiginninnikkut najoqqutassiat atuuttut illuatungeriinnut iluarinartunngortinniarlugit allannortinniarneqartassapput.

- 3.11 Suleqatigiinnissamut Ataatsimiititaliap pisussaaffigaa isumagissallugu suleqataasut tamakkerlutik ataatsimiititaliap suliai pillugit – allakkiatigut imaluunniit oqaatsitigut – ingerlaavartumik ilisimatinneqartarnissaat. Pitsaanerusut isumaqarfigineqaraangat pisortaasut suleqataasullu suleqatigiillutik paasissutissiillutik ataatsimiititsisarsinnaapput sammisassat immikkut ittut pkt. 3.3-imit pkt. 3.6-imut isumagisassatut eqqartorneqartut oqaluuseritinniarlugit.
- 3.12 Suleqatigiinnissamut Ataatsimiititaliap pisussaaffigaa ilaasortaminut ilinniarfissatut pisariaqartut aqutissiuussiffiginiassallugit.

Kapitali 4 Suleqatigiinnissamut Ataatsimiititaliap katitigaanissaa

- 4.1 Suleqatigiinnissamut Ataatsimiititaliami sinniisuullutik issiasussat amerlassusissaat aalajangerneqartassaaq suliffeqarfiup pisortaasa sulisullu sinniisaata/-sa / suliffeqarfimmi sulisunut sinniisaatitaasup/-sut isumaqatigiissuteqarnerisigut. Suliffeqarfiup sulisui suleqatigiiaat qassiiuppata imalluunniit immikkoortortat qassiiuppata sulisut sinniisigisamittut issiatitassaat suleqatigiiaat akunnerminni isumaqatigiissuteqarnerisigut ajornanngippat aalajangerneqartassaaq. Isumaqatigiittoqarsinnaanngippat sulisut sinniisutut issiatitassaasa pingasuunissaat aalajangiivigineqartassaaq.
- 4.2 Suleqatigiinnissamut Ataatsimiititaliami pisortaasut sinniisigisassaat sulisut sinniisigisaannit amerlanerusinnaanngillat.
- 4.3 Anguniarneqallaqunarpoq ataatsimiititaliat tunuliaqutaqarluartumik katitigaasarnissaat.
- 4.4 Suliffeqarfiup pisortaasa Suleqatigiinnissamut Ataatsimiititaliami sinniisigisassatik akunnerminni toqqartassavaat. Akisussaalluni pisortaasoq ataatsimiititaliamut siulittaasuussaaq. Ajornanngippat pisortaasut ataatsimiititaliami sinniisigisaasa sinniisussaannik toqqaaneqartassaaq.
- 4.5 Suleqataasut sinniisigisassaat suliffeqarfimmi atorfeqartut akornanni sulisunit qinerneqartassapput. Suleqatigiiaalli iluminni Sulisut Sinniisaannik qinigaasimasortaqpata qinersineq taakku akornanni pisassaaq. Siulittaasup tullia Suleqatigiinnissamut Ataatsimiititaliami sulisut sinniisigisaannit toqqarneqartassaaq. Suleqatigiinnissamut Ataatsimiititaliami toqqagaallutik ilaasortaasut sinniisussaannik toqqaasoqartassaaq taakkuninnga toqqaanermi najoqqutassat ma-leqqissaarlugit. Ilaasortaviusut pisinnaanngikkaangata sinniisussat taartaallutik Suleqatigiinnissamut Ataatsimiititaliami ataatsimeeqataasassapput.
- 4.6 Suleqatigiinnissamut Ataatsimiititaliami ilaasortat Sulisut Sinniisiginngisaat Sulisut Sinniisaattulli soraarsitaanissamut illersugaapput.
- 4.7 Suleqatigiinnissamut Ataatsimiititaliap ataatsimoorluni ataatsimiititaliamut allattaasussaaq toqqartassavaa, taassumalu ataatsimiititaliamut ilaasortaanissaa pisariaqanngilaq.

4.8 Ilaasortat sinniisussallu ukiut marlukkaarlugit toqqarneqartassapput. Tunngavissaaruppat toqqagaasimasooq tunuassaaq.

Kapitali 5 Suleqatigiinnissamut Ataatsimiititaliap suleriaasissaa

- 5.1 Siulittaasup tulliataluunniit pisariaqartitsinera naapertorlugu ataatsimiinneqartassaaq, minnerpaamilli ukiup sisamararterutaata iluani ataasiarluni. Aammattaaq ataatsimiittoqartassaaq sulisut sinniisigisaasa amerlanerussuteqartut siulittaasumut tullianulluunniit taamaaliortoqarnissaa apeqqutinik oqaluuseritikkusutaminnik nalunaaruteqarlutik kissaatigigaangassuk.
- 5.2 Ataatsimiigiaqqusinerit pisassapput sapaatit akunerinik pingasunik piffissaliilluni. Oqaluuserisassatut siunnersuutit ataatsimiinnissaaq sapaatit akunnerinik marlunnik sioqqullugu siulittaasumut tullianulluunniit tunniunneqareersimassapput. Oqaluuserisassat siulittaasup tulliatalu peqatigiillutik piareersartassavaat, oqaluuserisassallu ataatsimiinnissaaq sapaatip akunneranik ataatsimik sioqqullugu agguanneqartassapput. Piffissaliussatut taaneqartut immikkut pisoqartillugu saneqqunneqarsinnaapput, tamanna siulittaasup tulliatalu isumaqatigiissutigippassuk.
- 5.3 Ataatsimiititaliap allattaata ataatsimiinneq imaqarniliortassavaa. Imaqarniliaq siulittaasumit tullianillu akuerineqareeraangami agguanneqartassaaq tullianilu ataatsimiinnissami akuerineqartussanngorlugu saqqummiunneqartassalluni.
- 5.4 Aningaasartuutit ataatsimiititaliamut attuumassuteqartut suliffeqarfimmit aningaasartuutigineqartassapput.
- 5.5 Ataatsimiinnerit suliffiup nalaani ingerlanneqarajunnerusassapput. Suleqatigiinnissamut Ataatsimiititaliami suliassaminnut piffissamik pisariaqartitaminnik ilaasortat periarfissiivigineqartassapput, akissarsiatillu taamatut sulinerminni pigiinnartassavaat.
- 5.6 Immikkut ilisimasallit ataatsimiinnernut aggersarneqarsinnaapput, tassa tamanna ataatsimiititaliami isumaqatigiissutigineqarpat.
- 5.7 Isumaqatigiissutigineqarpat Suleqatigiinnissamut Ataatsimiititaliaq suliassanik aalajangersimasunik samminnittusannik ataatsimiititaliaaqqanik pilersitsisarsinnaavoq. Ataatsimiititaliaaqqat Suleqatigiinnissamut Ataatsimiititaliamit inuttalorsorneqartassapput, tassaasinnaallutillu suliffeqarfiup iluani sulisut allat. Ataatsimiititaliaaqqat Suleqatigiinnissamut Ataatsimiititaliaq suliassanik paasissutissittassavaat.
- 5.8 Illuatungeriit isumaqatigiinnissaaq anguniartassavaat, ajunngitsumillu isumaqatigiinniarusussuseqarneq saqqummersinneqanngikkaangat tamanna isumaqatigiissummik unioqqutitsinertut isigineqartassaaq. Isumaqatigiinnissap ilungersuutiginerani illuatungeriit KANUKOKA-mit sulisullu kattuffiinit attuumassuteqartunit ilitersooqqusinnaapput.

Kapitali 6 Isumaqatigiinnigssutit aaqqiivigineqartarnissaat

6.1 Ataqtigiissaarinermut Ataatsimiititaliamik illuatungaani KANUKOKA-mit sinniisuuffigineqartumik illuatungaani Kattuffinnit sinniisuuffigineqartumik pilersitsineqassaaq, illua tungeriillu tamarmik immikkut marlunnik ilaasortaataqassallutik. Kattuffiit nammineerlutik isumaqatigiissutigissavaat kikkut ataatsimiititaliamut sinniisigissanerlugit.

6.2 Ataqtigiissaarinermut Ataatsimiititaliaq makkuninnga isumagisassaqqarpoq:

1. Suleqatigiinnissamut Ataatsimiititaliat sulinissaat siuarsaavigissallugu, matuma ataani Suleqatigiinnissamut Ataatsimiititalianik pilersitsiniarnerni ilitsersuisuussalluni
2. Suleqatigiinnissamut Ataatsimiititalianut pilersinneqareersimasunut ilitsersuussisartuussalluni
3. Kapitali 1-mit 5-mut aalajangersakkanik isumasiuisassalluni
4. Isumaqatigiinnigssutaasut Suleqatigiinnissamut Atatsimiititalianit saqqummiunneqartut suliarisassallugit, tak. 6.2.3.

6.3 Ataqtigiissaarinermut Ataatsimiititaliamut siulittaasuusaaq KANUKOKA-p ataatsimiititaliami sinniisigisaata aappaa. Siulittaasumut tulliusaaq Kattuffiit sinniisigisaasa arlaat. Allatseqarneq KANUKOKA-mit isumagineqassaaq. Illuatungeriit tamarmik immikkut aningaasartuutit ataatsimiititaliamut attuumassuteqartut aningaasartuutigisassavaat.

6.4 Siulittaasup tulliataluunniit apeqqutinik oqaluuseritikkusutanik nalunaaruteqarlutik kissaateqarnerisigut ataatsimiittoqartassaaq. Ataatsimiigiaqqusinerit Suleqatigiinnissamut Ataatsimiititanik ataatsimiigiaqqusisarnertulli ingerlanneqartassapput, tak. pkt. 5.2.

6.5 Ataqtigiissaarinermut Ataatsimiititaliap pisussaaffigaa qularnaassallugu Ataqtigiissaarinermut Ataatsimiititaliap suliaannik Kommunit tamakkerlutik ilisimatinneqartarnissaat.

Kapitali 7 Atuutilerfissaa

7.1 Isumaqatigiissut manna atuutilissaaq 01. januar 2001-imi, qaammatillu pingasut siumut ilimasaarutigeqqaarlugu marsip 31-anut unitsinniarneqarsinnaalluni, siusinnerpaamik 31. marts 2002-mi.

Ulloq

KANUKOKA

Isumaqatigiissut akuersaarneqarpoq:

Kattuffiit tunngaviusumik isumaqatigiisummik akuersaartut aqqi ataani allattorneqassapput.